




Georg 907



Georgs-B.




CV



my...  
907



907



**Ursach der lere Jo-**  
hannis Langers von Dol-  
fenhayn/die er zu der Num-  
burggeleret hat/ an den Bi-  
schoff von Freysing vñ Num-  
burg geschriben ym latein  
vnd verdeutschet / das ein  
yderman sehe / warumb er  
seines predigerampts ent-  
urlaubet ist worden.

**Von Ceremonien Christ-**  
lichen/vnd der heiligen kirchen ord-  
nung/ Auch von viel andern stücken  
ein kurzer guter vnterricht.

ANHALTISCHE  
LANDESBÜCHEREI  
DESSAU.

D  
V  
C  
dan  
get  
Fei  
3  
ler  
Für  
mi  
zu  
pit  
leg  
zue  
ber  
ist  
ge  
fal  
sel



Den Erbarn / Achtbarn / Weisen  
vnd fürsichtigen herrn Burgermeister / Rathe  
vnd der gantzen Gemeyn der Stad Num-  
burg meinen besondern günstigen  
herrn vnd freunden.

**G**ottes gnade vnd frie-  
de zuuor / Erbare / Achtbare /  
weise vnd fürsichtige / groszüg-  
stige herrn vnd freunde / mir ist  
mein leben lang nicht ym synne ge-  
west / etwas ym druck lassen aus-  
zugehen / Denn es sind on das  
viel andere grosser geschicklichkeit /  
darzu von Gott begnadet / denn ich bin. Auch sa-  
get der prediger Salomo / viel bücher machens ist  
kein ende.

Die grosse not aber hat mich verursacht meiner  
lere bey euch gehabt / vrsach an ewern Bischoff /  
Fürsten vnd Herrn / ynn latein geschrieben von  
mir / auch verdeutschet durch den druck an den tag  
zu geben / Denn so yhr sampt dem Erwürdigen Ca-  
pitel der Thumkirche zur Numburg / an yhn ewer  
legation vnd botschafft abgefertiget hat / bey yhm  
zuerlangen / das ich lenger bey euch het mögen blei-  
ben / was zu entschuldung meiner lere furgewandt  
ist worden / hat er sich auff meine schrift an yhn  
gethan beruffen / als solt die gnugsam bezeugen die  
falscheit meiner lere / darumb mir von nöten die  
selbige vrsach meiner lere ans licht zubringen / das

Warumb  
dis büch  
kein ym-  
druck aus-  
gangen.

A ij man

man erkenne/wor auff meine lere gegründet ist.

Vnd dieweil yhr denn das mehrertheil die ge-  
hört hat/wert yhr als frome erbare Christen / der  
warheit zu gut/mir gezeuge sein / das ich also vnd  
nicht anders gelert habe. So denn diese meine lere  
ynn Gottes wort gegründet ist/vñ ich keine gründt-  
liche beweisunge widder die selbige empfangen ha-  
be/scheme ich mich der gar nichts/sondern bekens-  
ne sie frey für Gott vnd der gantzen welt.

Derhalben vermane ich euch aus Christlich/  
er brüderlicher liebe/bey Gottes wort/auff welch/  
es meine lere gebawet ist/bestendiglich zu bleiben/  
denn das wort / wie der Prophet saget / Ist eine  
leuchte vnd ein liecht darnach man sich richten sol  
mit allem vleys/durch den finstern weg des todes/  
sund/vnd hell. Tröstet euch des / das yhr gehört  
habt/behalt es ynn ewerm hertzen / lebet darnach  
mit friede vnd einigkeit ynn Gottes forcht/vertrauw  
vnd zuuersicht auff seine gnade vnd barmhertzig-  
keit/die ruffet an ynn einem rechten glauben mit  
gantzem hertzen / Das Gott ewer anligende not  
schicken wolt nach seinem Göttlichen wil /

len/vñ ewer seelen seligkeit/Das ges-  
be euch der almechtige Gott

Amen. Bit Gott auch für

mich. Datum zur

Numburg Son-

tag nach

Matthei.

1 5 2 9.

Johannes Langer  
von Zolkenhayn.



Dem Hochwirdigen ynn Gott va  
ter / Durchleuchten vnd Hochgebornen Fürsten  
vnd herrn / herrn Philippo Bischove zu Frey /  
singen / Administrator des Stiffts  
Numburg / Pfaltzgraue bey  
Hein vnd Hertzog ynn  
Bayern / meinem  
Gnedigen  
herrn.

**S**ittes gnad vnd  
fried / Hochwirdiger ynn  
Gott vater / Durchlechter  
Hochgeborner Fürst Gnedig  
ger herr / So vnter andern  
tugenden eins Bischoffs vnd  
Fürstens / das nicht die ge  
ringste ist / ein yderman hö / vnuer  
ren / vnd vnuerhört niemants richten vnd verdam / hört nye  
nen / den das ist das beyspiel Christi des Bischoffs mans  
vnser seelen / wie Petrus saget ynn der ersten Epist / richten.  
stel am andern Capit. Welcher hat niemand von  
sich verstoffen / auch nicht diesen tag verstoffet /  
der sunder sey auch wie gros er wölle / vnd das ist  
auch das furbild vnser herrn Gottes / des Fürsten  
hymel vnd erden / welchs vnser Fürsten diener sind /  
als Paulus saget zu den Römern am dreyzehen /  
den / Der selbige hat Adam / so er vbertretten hat /  
nicht verdammnet / er het yhn denn zuvor gehört /  
wie geschrieben stehet ym ersten buch Moysi  
A ij am

am dritten Capi. vnd so er die Sodomiter straffen wolt / sprach er zu Abraham / Es ist ein geschrey zu Sodom vnd Gomorra / das ist gros / vnd sünde / die sind fast schwere / darumb wil ich hinab faren / vnd sehen / ob sie alles than haben nach dem geschrey / das fur mich komen ist / odder obs nicht also sey / das ichs wisse / am ersten buch Mo / se am achtzehenden Capi.

Dieweil aber diese tugent L. F. G. angeboren ist / vnd nach ewerm Bischofflichem vnd Fürstlichem ampt oft vnd viel gebraucht / hat sie mir ein hertz gemacht / das ich mich nicht geschewet noch geforcht habe L. F. G. mit meinen vnzirlichen brieffen zubesuchen ynn gentslicher hoffnung / das ich ynn den selbigen werde gehört werde / vnd also gehört / nicht verdampt werden. Welchs fur nemlich derhalbē von mir geschicht / das ich nicht mit meinem stillschweigen zu den stücken darynne ich beschuldiget byn / mich selbst schuldig vn̄ strefflich mache / vnd also durch mein stillschweigen die warheit / gefahr vnd ferlickeit leiden liesse.

Beschuldung.

Ich bin aber beschuldiget / als ein widderwertiger vn̄sers heiligen glaubens / vnd wol erhaltenen Christenlichen ordnung der kirchen / Warlich ein grosse beschuldigung vnd die einer straffe würdig were / so sie war were / Aber ich wil mit hülff Christi vn̄sers herrn Gottes / der die warheit ist / beweisen / das mir solchs one warheit auffgelegt ist / Ich ermane aber vnd bit bey dem vnsterblichen Gott / L. F. G. nach yhrer angeborner gütigkeit / wölde gnediglich mein entschuldigung hören / vnd so ich  
yrgent

yrrent yrrer / nach yhrem Bischofflichem ampt/  
mich gütig leren.

Mir ist für war nicht bewust für Gott / dem  
niemants liegen kan / das ich etwas solt gelernet  
haben / das vnserm heiligen glauben widderwers  
tig were / Ja alle meine lere ist nichts anders ge  
west / ist noch nicht / vnd sol auch nymermehr wer  
den / mit Gottes gnaden / denn der glaub ynn Gott  
vnd Ihesum Christum vnsern herrn / durch welch  
en glauben wir gerechtfertiget vnd selig werden /  
Denn den glauben wolt Christus geprediget ha  
ben / so er zu seinen Jüngern saget / Gehet hyn / ynn  
alle welt / vnd prediget das Euangelion aller crea  
tur / Wer da gleubt vnd getaufft wird / der wird sel  
lig werden / Wer aber nicht gleubt / der wird ver  
dampt werden / Marci am letzten . Durch den  
glauben erlangē wir das ewige leben / als Johan  
nes der Teuffer saget / Wer an den Son gleubet /  
der hat das ewige lebē / Wer dem Son nicht gleu  
bet / der wird das leben nicht sehen / sondern der  
zorn Gottes bleibt vber yhm Johannis .iij. Durch  
den glauben werden wir gerechtfertiget / wie Pau  
lus saget zu den Römern am dritten . Die gerech  
tigkeit für Gott / kompt durch den glauben an Ihe  
sum Christ / zu allen vnd auff alle die da glauben.

Darumb aus dieser lere des glaubens / hab  
ich darnach geleret / das man keinen vertrau setz  
en solt auff vnser werck / auch das wir nichts ver  
dienen können . Gute werck hab ich nicht verpoten /  
sondern den vertrau vnd die zuuersicht auff die  
selbige /

Entschul  
digung.

Glaube.

Gute  
werck.

selbige / nach dem spruch Christi. Wenn yhr alles  
gethan habt / was euch befohlen ist / so sprecht/  
wir sind vnnütze knechte / wir haben gethan / das  
wir zuthun schuldig waren Luce am xvij. Cap. vnd  
nach diesem Pauli zu den Römern am .iij. Durch  
des gesetzts werck mag kein fleisch für yhm recht/  
fertig sein / Auch zu den Galatern am andern Cap.  
spricht er / denn so durch das gesetz gerechtigkeit  
kompt / so ist Christus vergeblich gestorben Nach  
dem ich die falsche znuorsicht guter werck hab aus  
geschlossen / hab ich endlich geleret / die menschen  
guts thuen / nicht etwas zuuerdienen / sondern  
Gott zu lob vnd ehren / zu nutz dem nehisten / vnd  
zu vnfers fleisches tödtung vnd casteyung. Also hab  
ich geleret beten / Gott loben / yhn allein anruffen  
ynn vnfern engsten / vnd yhm dancksagen vmb die  
entpfangene wolthat / der nehisten not dienstlich  
sein / fasten on auserwelung der speise / das fleisch  
creutzigen / vnd das creutz gedultig tragen / der  
oberkeit gehorsam zu sein / Vnd Kurtz von der sa /  
chen zu reden / ynn aller gottseligkeit vnd redlichkeit  
zu leben.

Dis ist die vrsach meiner lere vom glauben vnd  
guten wercken / aus welcher / meines bedunckens  
offenbar ist / das ich nichts vnserm heiligen glau /  
ben widderwertiges geleret habe. Ist aber etwas  
geyrret / so bist ich demütiglich vnderweisung aus  
Gottes wort.

Das ich aber Christenlichen wol erhaltenen sa /  
tzung vnd ordnung der kirche / nicht widderwertig  
gewesen sey / wil ich nu beweisen. Das sind aber  
Christenliche

Chri  
wel  
sch  
als  
solc  
spey  
ist v  
er is  
stan  
syn  
sag  
kon  
an  
der  
ant  
den  
bet  
mü  
ten  
sen  
cer  
nich  
des  
lan  
nie  
das  
tig  
mü  
ger  
ha  
sin

Christenliche satzung/ordnung vnd Ceremonien/  
welche ware vnd Gottselige Christen / vmb der  
schwachen vnd kleinen willen haben eingesetzt/  
als bereitung der volkomene gottseligkeit / denn  
solche bedürffen der milch/ vnd nicht der starcken  
speyse/denn ein iglicher der noch milch neusstet/der  
ist vnerfahren an dem wort der gerechtigkeit/denn  
er ist ein tungs kind/ Den vollkommenen aber gehört  
starcke speise/die durch gewonheit haben geübete  
sinnen zum vnterscheyd des guten vnd des bösen/  
saget die Epistel zu den Ebre. am v. Denn die vol/  
komene wissen das der vater anzubeten ist / nicht  
an dem odder diesem ort/mit dem oder einem an/  
dern dienst zu ehren/sondern warhafftige anbeten  
anbeten den Vater ym geyst/vñ ynn der warheit/  
denn der Vater will auch haben / die yhn also an/  
beten/Gott ist ein geyst/vnd die yhn anbeten / die  
müssen yhn ym geyst vnd ynn der warheit anbe/  
ten/Johannis am vierden/Vnd wiewol das wiss/  
sen die volkomene/doch halten sie die satzung vnd  
ceremonien zugleich mit den schwachen / das sie  
nicht geergert werden/bis das sie auch die freyheit  
des glaubens verstehen/vnd die vollkommenheit er/  
langen. Also sind satzung/ordnung vnd Ceremo/  
nien/den vnuorstendigen vnd kleinen von nöten/  
das sie damit als mit banden gehalten vnd gezüch/  
tiget werden / auff das nicht yhr schwaches ge/  
müt/durch böses gestürzt werde. Ynn dem selbst/  
gen aber sol man sie also leren/das sie durch yhrer  
haltung nicht meynen / das sie gerecht vnd from  
sind/odder das sie viel verdienen/ sondern das sie  
B nicht

Christli  
che Cere  
monien  
vnd ord  
nung.

nicht böses thun / vnd zu der gerechtigkeit des glaubens leichtlicher vnterweiset werden. Also hab ich geleret Christliche satzung / ordnung vnd Ceremonien zu halten.

Ceremonien  
Christlich  
genet  
die doch  
heydnisch  
vnd Jüdisch  
sind.

Es sind aber viel satzung vnd Ceremonien / welche Christlich genant werde / vnd sind es doch nicht / sondern viel mehr Heydnisch vnd Jüdisch / als mit wasser sprengē / das opffer der thier / reuch wergk / vnd was des gleichen mehr ist / Wider welche also redet der Herr durch Jesaiam am ersten Capit. Was sol mir die menge ewer opffer? spricht der Herr / Ich bin sat der brandopffer von widern / vnd des fetten von den gemesten / vnd hab keine lust zum blut der farren / der lemmer vnd böcke / wenn yhr herein Kompt zu erscheinen für mir / wer foddert solchs von ewern henden / das yhr auff meinen vorhoff trettet? Bringet nicht mehr speise opffer so vergeblich / das reuchwerck ist mir ein grewel etc. Also werden blosser Ceremonien / das ist / die nicht haben den glauben / barmhertzigkeit vnd liebe / vnd die anders gebraucht werden / den sie von Gott geboten sind / verstoffen von dem Herrn durch viel andere Propheten / Vnd Ihesus spricht zu den Phariseern / Gehet hyn vnd lernet / was das sey / Ich hab ein wolgefallen an der barmhertzigkeit / vnd nicht am opffer / Matthei am .9.

Jüdische  
Ceremonien  
bis  
auff Christum.

Gott hat wol gewolt / das man die selbigen Ceremonien halten solte / bis auff Christum / zum teyl / darumb das sie weren ein bezeugnis des glaubens / deren / so vnder dem gesetz waren / Denn yhr viel sind gewest ein furbild Christi / vnd haben schwacher

schw  
en/b  
geho  
abge  
ter e  
wür  
wüs

wol  
er d  
der  
bef  
heit  
ein  
Go  
and  
Cer  
and  
an  
no  
be  
D  
des  
ga  
lob  
hu

vn  
m  
ne



schwacher gewissen glauben / da mit / als mit zeich  
en / bestetiget. Zum teil hat sie Gott darumb wolt  
gehalten haben / das durch sie sein sonderlich volck  
abgesondert würde von allen Heyden / die abgöt  
ter ehrten / vnd das sein volck dadurch gezwungen  
würde zu der liebe vndereinander / nemlich so es  
wüste das eines Gottes volck were.

Zu der prediget aber des Euangelij hat er ge  
wolt / das solche Ceremonien solten auff hören / so  
er den glauben vnd die liebe durch andere weise vn  
derbawet hat / den itzunder wird vnser glaub nicht  
befestiget ynn einem furbild / sondern ynn der war  
heit vnd Christo / welchem wir glauben / das er sey  
ein furspreche vnd versünung für vnser sünde bey  
Gott / saget Johannes ynn der ersten Epistel am  
andern Capitel. Darumb so man nu die selbigen  
Ceremonien / als nötige / haltē wolt / were es nichts  
anders / denn so man an dem hellen tage wolte licht  
anzünden. Ja es wer ein bezeugnis / das Christus  
noch nicht mensch worden wer / Auch darff die lie  
be nicht gebrauchen der selbigen Ceremonien /  
Denn Christus ist nu nicht allein ynn dem winkel  
des Jüdischen landes bekant / sondern vom auff  
gang der Sonnen bis zu yhrem nydergang / ist ge  
lobet der name des Herrn / saget der Prophet ym  
hundert vnd zwelfften Psalm.

Des selben gleichen sind viel satzung / ordnung  
vnd Ceremonien / die sich ausgeben vnder dem na  
men der kirchē / nicht aber der gemeynen / sonder ei  
ner sonderlichen / als der Römischen / welche nicht

B ij ist allein

Auffhö  
ren Jüdi  
scher Ce  
remonien  
zur zeit  
des Eua  
gelij.

Ceremont  
en vii ord

nung vn-  
ter dem  
namē der  
Kirchen.

Ist allein die heilige Christliche Kirche vnd gemeyn/  
wie das beweiset der artickel vnser heiligen glau-  
bens / Ich glaube eine heilige Christliche Kirch/  
gemeynschafft der heiligen / Die gemeyn /  
schafft vnd versamlung der heiligen vnd glaubigen  
ist nicht allein zu Rom / sondern durch die gantze  
welt zustrawet / welche hat einen herrn / ein heubt  
Christum / einen glauben / eine Tauffe / das diese  
heilige Christliche Kirche von dem heiligen geist re-  
girt werde / bekenne ich frey / Der selbigen satzun-  
ge / sintemal sie gottselig sint / vnd Gottes wort  
gleichförmig / byn ich nicht widderwertig / Aber  
andern satzungen vnd ordnung nicht gemeyn /  
sondern einer sonderlichen Kirchen / Kan ich nicht al-  
lewege gleich gänstlig sein / sonderlich wenn man  
die foddert als nöttig zur ewige seligkeit / vnd wil  
damit die gewissen der menschen bestriicken / Ich  
lerne aber sie frey zu haltē / wie andere mittele ding  
die an sich selbst widder gut noch böse sind.

Dieraus ist offenbar / das ich nicht hab fur-  
genommen etwas zuuerändern ynn der Tauff / Mess-  
se / vnd ynn dem Sacramēt des köstbarlichen leich-  
nams vnd bluts vnser herrn Ihesu Christi / wid-  
der die satzung vnd ordnung Christi / vnd der heil-  
ligen Christlichen Kirchen vnd gemeyn / sondern ei-  
ner sonderlichen die da wil das man allein ynn la-  
teinischer sprach sol Teuffen vnd Messhalten / Ich  
hab allein gesaget / das man die sprache endern sol  
zu nutz vnd besserung der zuhörer / Ist denn das so  
vbel gethan ? Die lateinisch so falsch vnd vbel les-  
sen / das die so es lessen vnd hören / keine meynung  
Daraus

Dentsch  
Teuffen  
vñ Mess-  
halten.

dar  
also  
wen  
Ich  
vna  
sehe  
che  
brü  
hal  
ten  
ger

che  
Ep  
ich  
du  
ter  
ge  
te  
de  
K  
br  
be  
w  
un  
vn  
te  
w  
ch  
di



darans schepffen mügen / den wirds vergeben. Die  
also stille lesen vnd bey sich murren / das niemants  
weis / ob sie lesen / werden vnstrefflich gehalten.  
Ich habe ein ding angetragen / das Christo nicht  
vnangenehm ist / welcher als er nicht achtet das an-  
sehen der menschen / so sol er auch von allen sprach-  
en gelobet werden / Auch ist es nicht vnnützig den  
brüdern vnd Christen menschen / doch mus ich der  
halben grosse vngunst haben / bey denen die da sol-  
ten frolocken / vnd dis thun loben / so sie anders be-  
gerten die ehr Christi vnd des nehisten seligkeit.

Dieses meines vornehmens / hab ich ein reis-  
chen gezeug / den seligen Paulum ynn der ersten  
Epistel zu den Cor. am xiiii. da er also saget / Aber  
ich wil ynn der gemeyn lieber funff wort reden  
durch meinen synn / auff das ich auch andere vn-  
terwesse / den sonst zehen tausent wort mit der zung-  
en. Lesen auch die Kriechen lateinisch / oder die la-  
teiner lesen sie Kriechisch odder Hebreisch? So an  
der sprache ia macht lege / so solt man gebrauchen  
Kriechischer vnd Hebreischer sprach / welcher ge-  
braucht haben die Apostel vnd die Peter / Derhal-  
ben hab ich nicht vorgenommen ynn der Tauff et-  
was zuverändern widder die ordnung vnd einsetz-  
ung Christi / vnd der heiligen Christlichen kirche  
vnd gemeyn / sondern das ynn der sprache gehal-  
ten würde / die von dem volck möcht vernomen  
werden.

Desselben gleichen auch ynn der Mess / bey wel-  
cher ich bekenne das ich auch dis geleret hab / das  
die Mess nicht ein oppfer sey / sondern ein gedeicht-

B ij nis des

nis des opffers/nach der einsetzung Christi / so er  
saget / Das thut zu meinem gedechtnis / Luce am  
zwey vnd zwentzigsten.

Sacra-  
ment des  
warē leich-  
nams vñ  
bluts  
Christi /  
ynn bey-  
der ge-  
stalt /  
auch den  
leyhen zu  
geben.

Ynn dem Sacrament des köstbarlichen leich-  
nams vnd bluts vnser Herr Ihesu Christi / ist  
auch nichts von mir geschehen / das da wer wider  
die einsetzung Christi / vñ der Christlichen gemeyn.  
Das hab ich geleret / das man solt dasselbige hoch  
würdige Sacrament vnder beyder gestalt / mit teyl-  
len nicht allein den priestern / sondern auch andern  
nach der einsetzung Christi / so er saget / Trincket  
alle draus / Matthei am sechs vnd zwentzigsten /  
Denn das gantze Sacrament / odder beyde gestalt  
ynn dem abentmal des Herrn / ist entweder gege-  
ben allein den priestern / oder zugleich den leyhen /  
So es allein den priestern gegeben ist / so zimpt  
sichs ynn keinem wege / yrgent eine gestalt / den ley-  
hen zugeben / Denn man mus nicht aus vermessen-  
heit geben / dem es Christus nicht geben hat ynn  
der ersten einsetzung / Sonst so man eine einsetz-  
ung Christi lest verendert werden / so macht man  
alle seine gesetz vergeblich . So es aber auch zu-  
gleich den leyhen geben ist / so folget on alle ver-  
meydung / das man den leyhen nicht sol vorsagen bey-  
de gestalt. So es aber vorsaget wird zugeben de-  
nen die es begeren / so wird gehandelt wider Gott /  
wider das werck / exempel vnd einsetzung Christi /  
Das ist das vornehmen der heiligen kirche vnd ge-  
meyn / von der Apostel zeit durch viel iar / von den  
heiligen Vetern erhalten / wie man das beweisen  
kan / aus den seligen / Ireneo / Cypriano / Hiero-  
nymo /

nimo vnd andern viel mehr.

Das aber das Concilium zu Costnitz widder das offentliche wort Gottes beschloffen hat / das wird der Herr zu seiner zeit richten. Ich bekenne / das der Concilien ansehen vnd vermögen / vberwunden werde durch krafft der schrift / Denn der Concilien ansehen / henget also aus Göttlicher schrift / das yhn nicht gezymet widder die schrift etwas zu schliessen / Darumb spricht Christus Johannis am zehenden / Meine schaff hören meine stym / Vnd Paulus zu den Galatern am ersten Capitel saget / Aber so auch wir odder ein Engel vom hymel euch würde predigen / anders denn das wir euch geprediget haben / das sey verflucht.

Concilien können nicht schliessen wider die schrift.

Die den Concilijs viel zulegen / sagen / es kan nicht geyrret werden ynn sachen des glaubens / von denen die der heilige geist zusamen geruffen vnd versamlet hat. Nu wie wil man aber gewis sein / das sie von dem heiligen geist beruffen vñ versamlet sind / es sey denn das sie das beschliessen / welchs gewis ist / das von dem heiligen geist geoffenbart sey / vnd das die schrift beweret / denn alle schrift ist von Gott eingegeben / saget Paulus ynn der andern Epistel an Thimotheon am dritten Capitel / Vnd die heilige menschen Gottes haben geredt / getrieben von dem heiligen geist / spricht Petrus ynn der andern Epistel am ersten Capitel.

Concilia ym heiligen geist versamlet werde erkant aus beschliessen der schrift vñ Gottes worts.

Das ist meine lere / nicht newe / sondern alt / von Christo vnd seinen Aposteln vns gegeben /

Alte lere nit newe.

geben von den heiligen Vetern ein lange zeit ge-  
braucht.

Lange  
zeit vn-  
krefftig  
widder  
das Buch  
gelton vñ  
diese lere.

Die alten  
nicht alle  
verdamm-  
net.

Auffrur  
durch die  
lere vñ  
hüt.

Wiewol aber die andere lere / dieser widder-  
wertig auch ein lange zeit von vielen gehalten ist/  
vermag doch dasselbige nichts wider die warheit/  
Haben doch alle König zu Juda geyrret / on zwey  
funff hundert iare / ausgenommen allein drey Könige  
David / Ezechias vnd Josia / Vnd alle Könige zu  
Israel odder Samaritanen haben geyrret / vom Hies-  
roboam / bis auff den Dsee / vom ersten König bis  
auff den letzten / wolynn drithalb hundert iare /  
vnd betten alle die gülden kelber an / wie man ynn  
büchern der Könige liest. Ich wil aber darumb  
alle vnser vorfaren nicht verdammnen / denn ich  
halts gantzlich dafür / das aus grosser Gottes gna-  
de vnd barmhertzigkeit viel erhalten sind / Den der  
Danielen mit andern ynn der gottlosen stadt Ba-  
bylon erhalten hat / das er nicht widder Gott ges-  
than hat / der hat auch yhr viel aus vnsern vorsa-  
ren erhalten ynn einem rechten glauben / Er hat  
yhm lassen etliche vberbleiben / die nicht haben yhr  
re Knye beugte für dem Baal.

Auch ist aus meiner lere alhie kein auffrur  
worden / ja durch Gottes wort von mir gepredigt /  
so sich yhr keine erauget / ist sie vndergedrückt wor-  
den / des sind gezeug / Erstlich / der Erfordischen  
erster auffrur / nach meiner zukunfft gen der  
Numburg geschehen / aus welcher so etzlicher bö-  
ser menschen samen vnd anreizung alhieher ko-  
men wer / vnd sich etwas bevlissen zum verterb der  
Priester / so ich yhn nicht widderstanden / betten sie  
ein

ein guten Fortgang gehabt. Darnach der Bawer  
auffrur / der also hitzig war / das alles zu bodem  
gangen wer / so ich yhn wer zugefallen / Weil ich  
aber mit aller Krafft widerstrebet / so hat der wüt-  
tende grym auffgehöret / das bezeugen L. F. G.  
brieff / da zur zeit an Rath vnd gemeyne der Stadt  
Numburg geschrieben / ynn welchen L. F. G. lobet  
sie das sie fried vnd einigkeit gehalten haben. End /  
lich sind des gezeuge die Sacrament schwermer /  
welche lestern das hochwürdige Sacrament des  
leichnams vnd bluts vnsers herrn Ihesu Christi.  
Item / die widderteuffer / welche sich alhie sehen  
liessen / vnd heten yhre giff vnn das volck bracht /  
so ich nicht dawidder geschrieben het.

Das dieses alles aus Gottes hülff vnd seines  
wortes durch mich geschehen sey / müssen bekennen  
auch meine widdersacher / so sie nach yhrem gewiss-  
sen vnd der warheit reden wöllē / Das bekenne ich /  
das ich zu zeitten der priester vnd obersten laster ge-  
strafft habe nach meinem ampt / aus welcher straf-  
fung / so ich die warheit gesagt habe / sind mir et-  
liche gram worden / Aber es ist daraus nie kein  
auffrur worden / warumb wird denn meine lere  
beschuldiget als auffrürisch?

So ich aber aus Gottes gnaden / diese lere ent-  
pfangen habe / weis ich sie nicht mit gutem gewiss-  
sen zuuerbergen / Denn ich forchte das vrteil des  
vnrechten knechtes / welcher so er von dem Herrn  
ein centner empfangen het / vnd nichts damit han-  
delt vnd gewahn / Matthei am funff vnd zwentzig-  
sten. Wehe denen / die da wissen den willen des  
C      Herrn

Schwer  
vrt Eyl der  
ren die  
da wissen  
den willē  
des Herr  
ren / vnd  
thun yhn  
nicht.  
Auch der  
ren die  
yhn nicht  
wissen  
wollen.

✱  
Beschluss  
mit des  
märtiger  
bit.

Herrn / vnd thun yhn nicht / denn der Knecht der  
seines herrn willen weis / vnd hat sich nicht bereit /  
tet / auch nicht nach seinem willen than / der wird  
viel schlege leiden müssen / Luce am zwelfften. Weh  
denen / die es auch nicht wissen wöllen / denn ist yet  
mand vnwissend / den wird man auch nicht wissen  
saget Paulus ynn der ersten Epistel zu den Corin  
thern am vierzehenden Capitel.

✱ Das ich aber ein ende mache dieser schwetz  
gen meiner entschuldung / die doch not ist die war  
heit zu schützen / Nochwirdiger ynn Gott vater /  
Durchlauchter Hochgeborner Fürst Gnediger  
herr / so bit ich L. F. G. gantz demütiglich / durch  
ewre berümpfte vnd von yderman geliebte gütigkeit  
L. F. G. wolt ein gnedigere meynung von mir ha  
ben / Denn meine beschuldiger vnd angeber such  
en / vnd nicht als viel auff mich sehen / als auff L.  
F. G. seelen seligkeit / vnd vieler ander menschen /  
Denn welcher Fürst mag sicher genug sein für den  
falschen vnd betrieglichen ohrblasern? Die weil der  
henschler Syba auch Dauid den auserweltē nach  
Gottes hertze / abewandt von dem armen vnd  
hincckenden Miphiboseh / als wir lesen ym andern  
teyl Samuelis am sechzehenden Capitel. Ja ich  
bit vmb Christlicher warheit willen / welche mus  
verletzt werden / so ich vnrecht entweder gehört /  
verstoffen werde / odder veracht / der ich beger vn  
derweiset vnd gehört werden.

Nochwirdiger ynn Gott vater / Durchlauch  
ter Hochgeborner Fürst Gnediger herr / dis hab  
ich für

Ich fur grosse not angesehen zu schreiben vmb mei-  
ner entschuldung willen / auff das nicht aus schuld  
meines stillschweygens etwas schwerers keine ynn  
den synn vnd gemüt meines Gnedigen herrn / das  
wolt L. F. G. nach yhrer edlen gütigkeit gnedig-  
lich vnd gedultiglich erkennen / mit denen die der  
gotseligkeit geneyget sind / vnd meine geringikeit  
exorem grossen vnd hohen stand befohlen haben  
ynn Christo Ihesu vnserm Herrn / Welcher L. F.  
G. regire vnd erhalte ynn ewigkeit / Amen. Datum  
zur Numburg Sonnabent nach Ostern  
ym iar nach Christi geburt Tau-  
sent funffhundert vnd neun  
vnd zwentzig.

L. F. G.

Vndertensiger.

Johannes Langer von Bols-  
kenhayn / Prediger ynn S.  
Wencels kirchen zur Numb-  
burg.

Antwort des Bischoffs / Deudsch.

Philips von Botts gnaden / Bi-  
schoue zu Freysing / Administrator des  
Stiffts zur Numburg / Pfaltz/  
grane bey Rheim / vnd Herz-  
zog ynn Bayern.

**I**r wünschē dir das  
heyl deiner seel. Vns ist von  
dir ein schreiben zukomē / dar-  
ynn du vns deiner lere halbē/  
so du dich ynn vnser Stadt  
Numburg / gelernet haben/  
berhümeest / anzeigung thust/  
mit angehengtem begern / wo wir die selb dein lere  
yrrig achten / dich darynn zu vnterrichten / die ha-  
ben wir ynn dem / vnd andern alles ynhalts hören  
vorlesen. Vnd nach dem vns erstlich zumessen wol-  
test / als solten wir dich vnuerhört verurteilt ha-  
ben / beschicht mit vngrund / vnd thuest vns daryn  
vnrecht / Denn du bist dere vnd ander sachen hal-  
ben / vnserm beuelch nach / durch vnser nachge-  
setzte Oberkeit erfordert / aber vngehorsam aus-  
blieben / vnd nicht erschienen / darumb von vnnō-  
ten weiter entschuldigung zusuchen. Deiner lere  
halben / darynn du vnterricht begerst / weist du  
erstlich / das die selbig der heiligen Christlichen Kir-  
chen / gepflantzten / angenommenen / vnd bishero  
einhellighen

ein-  
gut/  
sam-  
liche  
so se-  
en se-  
nom-  
tiger  
vnd  
wo i-  
aus  
Ch-  
Do-  
nem  
vnt-  
seln  
nus-  
sta-  
seln  
Di-  
ha-  
ler  
Ch-  
bel-  
en  
fes-  
de-  
sch-  
cil-  
vn-  
se-



einheitlichen gehalten ordnungē/ entgegen nicht  
gut/ vnd anders nichts / denn ergernis / vngehor-  
sam/ zertrennung/ vñ absonderung von der Christ-  
lichen kirchen einigkeit mit sich bringt. Zu dem/  
so sein deiner leer halben/ ynn der heiligen göttlich-  
en schrifften/ vnd der selben von der kirchen ange-  
nommen vnd approbierten auslegen/ so viel nottürf-  
tiger/ guter/ gründiger vnd bestendiger furschung  
vnd vnterricht vorhanden vnd vor augen/ also/  
wo du hyrrüber dein verstand vnd vernunft ynn  
auslegung der göttlichen schrifften / der heiligen  
Christlichen kirchen / vnd der selben angenohmen  
Doctorn/ fursetzen vnd mehr zumessen willst/ Kön-  
nen wir wol abnemen/ das darüber bey dir vnser  
vnterweisung nicht allein on frucht/ sondern zweif-  
seln nicht/ ob auch Matthæus/ Paulus / Augusti-  
nus selbst / odder ein ander dich der schrift ver-  
stand zu vnterweisen/ von den todten auffstände/  
sein bericht würde bey dir auch nicht stat haben.  
Die weil denn auch auff itzt iüngst zu Speyr ge-  
haltenen Reichstag / Kayserlich Maiestat vnser al-  
ler gnedigster herr / ynn sachen vnsern heiligen  
Christlichen glauben / Religion vnd Ceremonien  
belangend/ Yhr Maiestat meinung vnd ernstlich-  
en benehch hat lassen eroffnen/ Auch durch yhr Ma-  
iestat Commissari/ Churfürsten/ Fürsten vñ Stend  
des heiligen Römischen Reichs / herynnen ein be-  
schlus vñ abschiede/ wie es bis zu künfftigem Con-  
cili / vnd sonsten gehalten werden soll / gemacht/  
vnd wir vns erkennen nicht allein ynn dem yhr Ma-  
iestat gehorsam zu leysten/ des Reichs abschiede zu  
C iij geleben

geleben/vnd von der heiligen Christlichen Kirchen  
nicht zu sondern/odder zu weichen / sondern auch  
vnser beuolhnen vnterthanen / darzu zu weisen vñ  
zu halten/vor abfall vnd schaden yhrer ehren / se-  
ligkeit/leib vnd guts/souiel vns müglich zuerwar-  
nen vnd zuerhütten.

Dem allen nach/wissen noch gedenccken wir  
vnsern hieryn vorgethanen beuelch / nicht abzu-  
schaffen/sondern wöllen das dem selben nachma-  
len/also nachgangen vnd gelebt werde/daran ges-  
schicht vnser ernstlich meynung. Haben wir  
des wissen zu haben vnangezeigt nicht  
wöllen lassen. Datum ynn vns

ser Stadt Freysing /am

Sampstag nach

Corporis

Christi. Anno

1529.

An Johann Langer  
zur Numburg.

Auff des Bischoues antwort/

Replica Johannis Langers von  
Volkhenhayn.



Nach dem ich ynn mei-  
nem schreibē an den Bischofferst-  
lich demüthiglich gebeten habe/  
das er nach seinem Bischofflichen  
vnd Fürstlichē ampt/ wolte mich  
ynn meinem schreiben hören / vnd  
also vngheört / nicht verdamnen/  
Darauff schreibet er/ das es besche mit vngrund/  
vnd thue yhm dran vnrecht. Aber mit was vn-  
grund vnd vnrecht das beschehen sey / wil ich aus  
seinen schrifften beweisen/ die er an Burgermeister  
Rath vnd Gaszmeystern der Stad Numburg ge-  
schrieben hat / an welcher beschlus also geschrie-  
ben ist/ Vnd nach dem wir auch aus ewerm getha-  
nen schreiben / vnd vberschickten copien / bericht  
entpfangē/ das yhr ewers an vns gelangten bege-  
rens von itzigem ewerm Predicanten / der solchs  
vnd mehrers vnserm heiligen glauben vnd woler-  
haltenen Christlichen ordnungen widderwertiges  
ynn euch bildet/ vrsach schöpfft. Ist an euch vnser  
begeren vnd ernstlich beuelh/ yhr wöllet denselben  
seines Predigerampts bemüssigen / vnd von dem  
selbigen enturlauben. Wir haben auch vnserm  
Dicarij/ Stadthalter vnd Rethen zu Ezeit/ weit-  
ter mit dem selben ewerm Predicanten / was sich  
gepürt zu handeln/ beuelh thun etc.

Aus diesem

Das der  
Prediger  
vngheört  
verurteilt  
sey.

chen  
auch  
n vii  
/ se  
war

wir  
bzus  
mas  
nges  
r



Aus diesem kan ein yderman wol abnemen/ das ich vnuerhört verdampt worden bin/ so er dem Rath ernstlich beuilht zuenturlauben mich / des antwort vnd entschuldigung er noch nicht gehört hat. Auch das er schreibet/er habe seinen Rethen zu Czeitz weiter beuelh than/ mit mir zuhandeln was sich gepürt / welchs ia sind wort einer gewissen vorurteylung.

Das ich aber auff seiner nachgesetzten Oberkeit erfordern/ausblieben byn/ist nicht aus vngeshorsam odder forcht geschehen / sondern aus bewegenden vrsachen eines Erbarn Raths der Stad Numburg/ welcher seine gesandten gegen Czeitz/ dazumal abgefertiget hat/ vnd des Bischofflichen beuelhs/ einen auffschub erlanget haben. Zu dem so hat das erwürdige Capitel der Thumkirchen zur Numburg derhalben an Stathalter vnd Rethen zu Czeitz geschrieben für mich.

Zum andern / so ich meiner lere vnderricht/ begert habe aus Gottes wort/wo ich yrgent yrrer. Auff dis saget er erstlich/ das dieselbig der heiligen Christlichen kirchen/ gepflantzten/ angenommen vñ bishero einhellighen gehalten ordnung entgegen/ nicht gut/ vnd anders nichts; denn ergernis/ vngeshorsam/ zertrennung vnd absonderung von der Christlichen kirchen einigkeit mit sich bringe. Ich aber hab ynn meinem schreiben an den Bischoff klerlich gnug angesetzt/ das mein lere nicht entgegen sey der heiligen Christlichen kirche/ welche ist ein gemeinschafft der heiligen / ynn einem glauben vnd ynn einer tauffe / versamlet ynn der gantzen

Christliche  
Kirche

gantzen welt / nicht allein zu Rom / Darumb ob  
meine lere nicht allwege einhellig gewesen ist mit  
den ordnung der Römischen kirchen / vnd deren/  
die yhr voreydet sind / ist sie derhalben nicht entge  
gen der heiligen Christlichen kirchen ordnung / wel  
cher vnghehorsam / zertrennung vnd absonderung  
sie nichtgeleret hat.

So aber meine lere etlichen nicht gut gewe  
sen ist / vnd ergernis mit sich gebracht hat / ist kein  
wunder / Denn viel der Jünger Christi haben sich  
an seiner lere vnd prediget geergert / das sie hinder  
sich giengen / vnd wandelten fort nicht mehr mit  
yhm / Johannis am sechsten Capitel. Simeon  
sprach zu Maria der mutter Christi / Siehe / dieser  
wird gesetzt zu einem fall vnd auff stehen vieler ynn  
Israel / vnd zu einem zeichen / dem widdersproch  
en wird / Luce am andern Capitel. Paulus saget  
ynn der andern Epistel zu den Corinthern am an  
dern Capitel / Wir sind Gotte ein gutter geruch  
Christi / beide vnter denen die selig werden / vnd  
vnter denen die verloren werden / diesen ein ges  
ruch des todes zum todt / yhenen aber ein geruch  
des lebens zum leben.

Darnach weist er mich / der ich von yhm vnt  
derweisung begert habe aus Gottes wort / an die  
auslegung der göttlichen schrifftten / der heiligen  
Christlichen kirchen / vnd der selben angenommen  
Doctorn / so doch vnter den selbigen der grosse  
sonderliche lerer Sanct Augustinus also schreibet  
zu Sanct Hieronymo / Ich gebe alleine den heilli  
gen büchern / die da Canonici heissen / die ehre / das  
ich festiglich glaube / keinen der selben schreiber ge

**D** yrret

Die lere  
des Luz  
gely nicht  
allen gut  
vnd viel  
ergern  
sich dran.

Ausle  
gung der  
gölichen

/ das  
dem  
/ des  
ehört  
ethen  
ndeln  
ewiss

ber/  
vngel  
as bes  
Stad  
zeit/  
lichen  
dem  
en zur  
the zu

richt/  
yrret.  
iligen  
en vñ  
ntges  
rnis/  
g von  
ringe.  
n Bis  
nicht  
/ wels  
einem  
n der  
ntzen

Schrieffe/  
von der  
Kirchen  
vñ der sel  
ben ange  
nomē Do  
ctorn/ist  
nichts/on  
beweisig  
der heilic  
gē schrifft

yrret habe / vnd so ich ynn den selbigen schrifftern  
finde / das sich lest ansehen der warheit widder  
wertig / so halt ichs nicht anders / denn das das  
buch falsch sey / odder der dolmetscher nicht die  
art der sprachen erlanget hat / odder das ichs nicht  
verstanden habe / zweyffel ich nicht / Die andern  
aber alle lese ich also / das / wie hoch sie scheynen  
mit kunst vnd heiligkeit / dennocht nicht darumb  
recht achte / das sie also halten / sondern wo sie  
mirs mit den sprüchen der heiligen schrifft / odder  
heller vernunft beweisen / dis anzeiget auch das  
genant geistlich recht.

Das er aber diesem anhenget / sondern zwey  
feln nicht / ob auch Mattheus / Paulus / Augusti  
nus selbst / odder ein ander / dich der schrifft ver  
stand zu vnterweisen von den todten auff stünde /  
sein bericht würde bey dir auch nicht stat haben /  
Dis ist auff die weise geredt / als solt ich vnder  
weisung ausgeschlagen haben / so ich doch der al  
lezeit begert habe / auch von einem kinde / ich ge  
schweige denn von einem Bischoff / der da mecht  
tig sein sol zu ermanen durch die heylsamer lere /  
vnd zu straffen die widdersprecher / saget Paulus  
ynn der Epistel an Titon am ersten Capitel. Auch  
weis ich was Abraham saget zu dem reichen man  
der da begeret / das er Esarum den verstorbenen /  
sendet ynn seines vaters hause / seinen brüdern zube  
zeugen / auff das sie nicht auch kōmen an den ort  
der qual. Sie haben / sprach Abraham / Moysen  
vnd die Propheten / las sie dieselben hören / Luce  
am sechzehenden capitel. Darumb mir nicht von  
nöten / bericht von den todten / sondern an dem hel  
lem /

Von dem  
todten ni  
cht zu les  
ren / son  
dern aus  
Gottes  
wort.

lem/  
die h  
ben v  
Vnd  
de/d  
sen l

vnd  
Reic  
der r  
Vnd  
and  
auff  
wer  
run  
vnd  
ia d  
det

gru  
nen  
bet  
am  
Jel  
ph  
sey  
litz  
feit

lem/ klaren vnd vnuerfälschten Gottes wort / das  
die heiligen menschen Gottes haben geredt / getrie-  
ben von dem heiligen geist / las ich mir genügen /  
Vnd so ich durch dasselbige anders vnderricht wer-  
de / denn ich geleret habe / wil ich mich vnderwei-  
sen lassen.

Zum dritten zeuget er sich auff den beschlus  
vnd abschied des itzt jüngst zu Speyr gehaltenen  
Reichstage / welcher doch nicht allenthalbe wid-  
der meine lere ist / denn vnder andern helt er also /  
Vnd aber bey den andern stenden / bey denen die  
andere leren entstanden / vnd zum teyl on mercklich  
auffrur / beschwert vnd geuerde / nicht abgewandt  
werden mögen / sol doch hynfur alle weiter new-  
rung bis zu künfftigem Concilio / so viel müglich  
vnd menschlich vorhüt werden. Diese wort geben  
ia das diese lere / an weiter newrung / sol gedul-  
det werden bis zu künfftigem Concilio.

Aus diesem allen ist offenbar / mit welchem  
grund vnd recht der Bischoff beschleust / das sei-  
nem vorgethanen beuelh nachgangen vnd gele-  
bet werde / durch welchen ich meines Prediger /  
ampts zur Numburg entursaubet hyn worden.  
Ich aber wil beschliessen vnd bitten mit dem Pro-  
pheten an dem sieben vnd sechtzigsten psalm. Gott  
sey vns gnedig vnd segene vns / Er las vns sein and-  
litz leuchten. Sela. Das wir auff erden erkennen  
seinen weg / vnter allen Heyden sein heyl. / Amen.

**Gottes wort bleibt ewigk.**

Gedruckt zu Wittenberg durch Georgen Rhaw.

1 5 2 9.

D ij


Faint, illegible text, likely bleed-through from the reverse side of the page.











*Handwritten text in cursive script, likely a library or collection mark.*

907  
George-B.







987

1.



Vrsach der lere Jo/  
hannis Langers von Vol/  
kenhayn/die er zu der Num/  
burg geleret hat/ an den Bi.

